

JOHN WESLEY
AJAR KE 25
Ajar ba Bukit ke – 5

.....
“Anang ngumbai Aku datai deka muai Adat, tauka muai ajar sida nabi. Aku ukai datai deka muai Adat, tang deka ngamatka iya. Laban, enggau bendar Aku madah ngagai kita, sebedau langit enggau dunya lesap, nadai leka jaku tauka titik ti pemadu mit deka lenyau ari adat, sebedau semua utai dikamatka. Nya alai, barang sapa ngelanggar pesan ti pemadu mit tu, lalu ngajar orang ngelanggar iya, deka dikumbai pemadu mit dalam Perintah Serega, tang barang sapa ngasika pesan, lalu ngajar orang ngasika iya, deka dikumbai besai dalam Perintah Serega. Laban, Aku madah ngagai kita, enti kita enda lebih agi lurus ari sida Pengajar Adat enggau orang Parisi, kita enda ulih tama Perintah Serega. **(Injil Mathew 5:17-20)**

1. Mayuh ukum ke diletak ninggang Jesus Kristus, Iya “dikeleseka lalu ditulak orang.” Jaku bantah ke dikena nyakal Jesus, iyanya Iya dikumbai pengajar ke penemu baru, tauka Iya dikumbai siku orang ke ngelala ka agama baru. Jesus Kristus balat amat disakal pengelaban Iya, beduduk ari Iya ngena mayuh chara nerangka batang ajar lalu penerang Iya ke baka nya jarang sereta enda teleba didinga ba raban orang Judah. Tauka nyangka sida nadai kala ngena penerang ajar ke baka nya, tauka mega reti penerang enggi sida enda sama enggau enggi Jesus, sekalika chara penerang ajar sida ti nadai mai reti ke penuh kuasa. Ajar Jesus nerusuk ke dalam ati laban Jesus ngerah kitai enda tau enda “nyembah Apai dalam Roh enggau Pemendar.” Churak ajar Jesus nya dikumbai ajar agama baru ba sida ti nadai nemu utai sebedau nya, taja sida dipeda meruan besesbiang. Tuhan Jesus mantah sida laban sida semina nemu “penuchi ba gaya ti dipeda mata.” (Outward Religion).

2. Nyangka sekeda orang ngumbai Jesus muai agama lama lalu mai agama baru. Bisi mega sekeda orang deka bisi agama ke nundukka sida lalu nyediaka sida jalai kelebihan mudah agi datai di Serega. Tang dalam genteran Bup Kudus tu, Tuhan Jesus nyangkar pengarap tauka pengadang ti beduduk ba orang siku ti nadai mai apa nama lalu pia mega pengarap ke nadai bepelasar ba orang bukai.

Diatu aku deka nyerungkai Jaku Jesus ari genteran siti ngagai genteran siti enggau chara ngena tiap genteran nyadi bagi ke dikena mantaika ajar tu.

I. Injil Kristus nya Ngamatka Adat

1. Keterubah, Ku Jesus, Anang ngumbai Aku datai deka muai Adat, tauka muai ajar sida nabi. Aku ukai datai deka muai Adat, tang deka ngamatka iya. Tuhan kitai sanggup datai nganchur, mambar sereta nagang adat ti semina bechurak ritual tauka atur dalam sembiang aja, nundaka udah diajar Moses ngagai raban Israel. Adat nya ngundan semua adat sereta atur ti besangkut paut enggau piring genselan pia mega gawai – gawai pengarap ba Langkau kain Tuhan.

Rasul Barnabas, Paul enggau mega Rasul – rasul kebukai bela besaksika Tuhan Jesus muai semua atur gawai – gawai (ceremony) dalam Sempekata Lama. Sida Rasul bebendar ngelaban sekeda sida ke ngajar bakatu; barang sapa nyadi orang Kristian mesti “nitihka adat asal Moses”. Rasul Peter mega enda setuju enggau sida ke ngemeranka adat Moses nya di-dintu, ku Rasul Peter bejaku enggau sida; “Nya alai diatu, nama kebuah kita nguji Allah Taala, ngengkahka tangkun ti berat ba rekung sida murid, tangkun ti enda ulih disan aki ini kitai tauka kitai empu?”

Enggau nya bala Rasul, tuai eklisia lalu disukung semua raban eklisia begempung penemu madahka, enti sida dipinta ngintu adat Moses, nya deka “ngerusakka runding sida”. Dalam Sempekat Baru, runding Roh Kudus enggau runding bala Rasul madahka; komaniti Kristian enda patut ditating adat nya. Tuhan kitai muai sumpah ti ditulis dalam Bup Adat, ke ngelaban kitai. Kristus nebus kitai ari sumpah ti dibai Adat, laban Iya udah nejuka Diri ditinggang sumpah ngarika kitai, laban endang udah ditulis, “Tulah meh semua orang ke digantung ari kayu regang.”

2. Allah Taala enda muai Adat ke dikumbai Adat Moral. Adat tu bisi dalam Sepuluh Pesau Allah Taala lalu dikeringka bala nabi. Tuju penatai Jesus Kristus nadai sekali deka muai siti ari bagi Adat Moral. Adat nya sigi nadai tau dibuai, lalu deka meruan belama – lama iya. Pelasar Adat Moral tu enda sebaka enggau pelasar Adat gawai tauka piring (ceremonial) sekaligus ritual, ti semina digaga sementara aja ke orang ti enda taluk sereta enda mending.

Adat Moral endang udah bisi ari pun dunya. Ba pun iya, Adat tu enda ditulis ba dua lampang batu, tang ditulis dalam ati mensia, ti digaga Tuhan ke Pengaga semua utai. Surat Adat Moral, ke ditulis jari Allah Taala, diatu udah balat kamah laban dosa. Adat Moral tu enda ulih dibuai, seagi – agi kitai ngembuan penginein ati ke utai ti manah enggau ti jai. Tiap bagi ba Adat tu mesti nyadi ba dalam semua kitai lalu ba semua abad mega. Adat Moral tu enda begantung ba timpuh maya, endur tauka ba tiap pengubah apa nama ke bisi nyadi. Adat nya bisi ba ulah Tuhan, ba ulah kitai mensia, lalu Adat Moral tu deka ngada buah pengidup enti tiap iti adat nya bela di-intu.

3. Aram kitai berundingka genteran Jaku Tuhan tu, “Aku ukai datai deka muai Adat, tang deka ngamatka iya.” Sekeda orang ngumbai reti jaku Tuhan tu madahka Tuhan empu datai ngamatka Adat asal Moses nya enggau penuh penaluk sereta sempurna. Retinya nadai agi pengakang laban Tuhan Empu ti ngamatka tiap bengkah Adat nya. Tang dalam genteran Jaku Tuhan tu nadai ayan nyata ni bagi Adat ke dikamatka Iya sekaligus Adat gawai pengarap tauka Adat Moral. Ajar Jesus ba bukit tu ukai mekuh ba penaluk Jesus ke adat, tang Tuhan meruan tetap tegap dalam Jaku Iya, enggau nadai pengakang agi, Iya datai deka numbuh lalu ngemansangka serampur adat Moral nya dalam pengidup kitai.

Jesus bejaku madahka penatai Iya deka mantaika enggau terang nama utai ti bisi sereta utai ti enda tentu nyengala bekaul enggau Adat nya. Ku Jesus, “Aku datai ngambika ngayanka utai ti bendar sereta reti ti sempurna ari tiap iti bagi Adat nya. Aku deka nerangka pemanjai enggau penebal semua reti ari tiap pesan dalam Adat Moral nya, Aku deka madahka peninggi, penalam, penuchi enggau roh ari Adat nya dalam tiap bagi sukut.

4. Ba bagi ajar ba bukit ke nangkanka tu, dia Tuhan kitai meri ke kitai pemeretika chukup sempurna pasal Adat Moral tu. Ari nya, kitai deka nemu Iya ukai mai agama baru ngagai dunya tu. Agama tauka pengarap ke Tuhan Jesus Kristus tu sama enggau agama ti diberi Allah Taala ba pun iya kelia. Iya agama ke ngembuan batang tauka isi (Substance or Essence) ti enda ulih dikelikuhka laban semua nya ba Tuhan ti Pengaga semua utai empu. Endang iya, asal semua kitai mensia datai ari Allah Taala, ari pun kelia lebuh lelaki enggau indu keterubah digaga nyadi “utai idup” (tu ke dikumbai aku, isi agama (Substance agama) laban ba beberapa segi Adat nya bekait enggau mensia ti udah labuh dalam dosa).

Ba rebak ke deka datai, nemuka nya adat tauka Bup Nabi nyadi saksi ngagai agama tu. Tang Adat Moral enda pengabis iya ulih diterangka sereta diperetika enggau

sempurna, semadi meh penatai Tuhan Allah Taala empu ke sigi nulis adat nya empu, ngemaruhka diri meri penerangka asal Adat nya ngagai kitai mensia. Lebu mayanya, Iya deka madahka Adat Moral nya sigi nadai kala berubah, tang tetap nyadi penegap dataika pengujung dunya.

II. Timbang Entara Adat enggau Injil

1. Jesus ngepuka penerang Iya pasal Adat Moral tu enggau jaku bakatu, “enggau bendar Aku madah ngagai kita.” Pemuka jaku ajar Jesus penuh enggau reti ti nerangka: Pemerat guna enggau pemendar pekara ti disebut Iya. Ku Iya “sebedau langit enggau dunya lesap, nadai leka jaku tauka titik ti pemadu mit deka lenyau ari adat, sebedau semua utai dikamatka.”

Leman Jaku ke dikena Jesus: “nadai leka jaku tauka titik ti pemadu mit deka lenyau ari adat, sebedau semua utai dikamatka.” Madahka nadai siti pesan dalam Adat Moral nya deka dibuai, tauka nadai siti ari bagi ke mit ari pesan nya deka dipadamka.

Nadai siti leka jaku tauka/ urup ti disebut dalam Adat Moral deka dilenyauka bakanya aja. Ba dalam genteran jaku Yunani, tanda negative ti beganda bereti ngeringka reti sesebengkah jaku, iya mega mai reti enda ngemendarka reti jaku nya dipetalatka. Lalu ke ulih dipeda kitai ba leka jaku “dilenyauka” enda semina madahka utai ti deka nyadi ba timpuhka deka datai. Tang jaku nya mega jaku ke meri pesan, tauka merintah utai ti deka nyadi. Nya meh Jaku enggau kuasa, ti nerangka kuasa Tuhan lalu kuasa ke bejaku nya datai ari Tuhan. Nya meh utai ti dipadahka Tuhan ti bempu Jaku iyanya Adat Serega enggau dunya, lalu Jaku Iya deka meruan berdiri teguh belama – lama iya.

Ku Jesus, “nadai leka jaku tauka titik ti pemadu mit deka lenyau ari adat, sebedau semua utai dikamatka.” Nadai ruang endur muai adat (ti enda ngelantangka sida empu) sebedau semua Adat nya dikamatka dalam Jesus Kristus. Sekeda orang ngadang enggau enda betul, sida madahka Jesus ngamatka Adat Moral, tang diatu udah digaga enda mujur laban ngambika ulih diganti enggau Injil. Pemeretika bansa tu amat salah. Leka jaku “semua” ukai bereti semua Adat; tang reti iya semua hal dalam dunya. Ba reti ke sebaka; leka jaku “dikamatka” ukai bejakuka Adat, tang nunjukka hal di langit enggau di dunya.

2. Kitai tau belajar ari pemeratika Adat enggau Injil, enti kitai deka ngemansangka Injil, kitai enda beguna bebuai Adat Moral, laban antara Adat Moral enggau Injil nadai belaban enggau pangan diri. Nadai siti ari antara dua iti nya deka nganti pangan diri, tang kedua – dua pekara nya begulai nyadi chukup sempurna. Kitai betimbangka dua pekara tu enggau bejimat, jaku ke sebaka iyanya pugu antara Adat enggau Injil. Enti kitai betimbang dua pekara tu iyanya “pesan” tauka “semaya”, dia “pesan” nya ari bagi Adat; lalu “semaya” nya ari bagi Injil.

Buah ajar “nuan mesti rinduka Tuhan enggau pengabis ati,” lebu ditimbang kitai baka pesan, dia iya ari bagi Adat. Lebu iya dikaitka enggau semaya, iya bagi ari pugu Injil. Injil enda lebih ari gaya ke diguna Adat, tuju iya iyanya besemaya. Sechuan bendar enggau penyeranta dalam roh, penuchi ati, sereta mega barang utai ti dipesan dalam Adat kudus Allah Taala, lebu dipeda dalam penampak Injil, iya amat berega sereta semaya ti pemadu tinggi.

3. Nyangka sigi bisi kaul ti amat semak antara Adat enggau Injil. Bisi sukut endur alai kitai tau meda Adat tu nyendia ungkup Injil sereta nunjukka kitai ngagai Injil. Ba sukut bukai mega, Injil majak terus ngiring kitai niti - nali Adat enggau betul. Ngambika

chunto, Adat begunaka kitai rinduka Tuhan, rinduka diri sama diri, nyadi nelap, baruh ati sereta kudus. Kitai ngasai kediri enda chukup ba senentang semua nya: kitai nemu, ‘kitai mensia enda ulih.’” Dalam Injil kitai meda semaya Allah Taala meri kitai pengasih lalu ngaga kitai baruh ati, nelap sereta kudus. Kitai meri runag ke Berita Manah Injil dalam pengidup, lalu nundaka pengarap kitai. Hal tu nyadi ba kitai, semina lebu utai ti dikedeka Adat dititih ke dalam pengidup kitai, nengah pengarap dalam Yesus Kristus.

Kitai mega meda jauh agi, tiap pesan dalam Bup Kudus amat – amat semaya ti dilamun. Dalam jaku pemadah ke nangkan nya, Allah Taala besemaya deka meri utai ti dipesan Iya:

“Tu sempekat ti deka digaga Aku enggau sida udah bekau nya ila, ku Tuhan bejaku: Aku deka nyimpan Adat Aku dalam ati sida lalu nuliska Adat nya dalam runding sida.” (Hebrew 10:16).

Kati Tuhan Allah Taala nya merintah kitai ngambika “besampi nadai ngetu,” “selalu gaga ati” sereta “selalu idup kudus, laban Tuhan kudus”? Perintah nya udah chukup – Allah Taala deka bekereja dalam kitai. Adat nya deka enggau kitai, nundaka Jaku Iya.

4. Tang enti hal tu amat baka nya, dia kitai tau iran ngagai sida ti idup sepemanjai zaman Gereja ti nguji ngubah tauka nganti beberapa iti pesan Allah Taala, indah sida nya ngaku diri di-iring Roh Kudus ngereja nya. Dalam ajar ba bukit, Kristus udah meri ka kitai atur ti ngena, iya ke patut ditanya iyanya semua kereja ngubah Jaku Iya. Enti kitai mendingka pesan Tuhan Allah Taala, kitai deka belajar ke atur perintah (dispensation) ke penudi iyanya pasal pengidup Kristian, nyengkaum serampur Adat Moral Allah Taala, enggau mega jalai tauka chara pesan sereta semaya sempekat Iya.

Nadai atur perintah (dispensation) bukai pengudah timpuh ada. Atur perintah nya deka terus dataika semua utai dikamatka. Nya alai semua penerangka baru nya datai ari sitan, ukai ari Allah Taala, semua hal ka pura – pura ti dipeda chukup sempurna dalam atur perintah (dispensation) deka labuh ke tanah. “Langit enggau dunya deka lenyau, tang Jaku Tuhan enda mudah lenyau”.

III. Jaku Tuhan Deka Terus Bekuasa

1. Ku Yesus, “Nya alai, barang sapa ngelanggar pesan ti pemadu mit tu, lalu ngajar orang ngelanggar iya, deka dikumbai pemadu mit dalam Perintah Serega, tang barang sapa ngasika pesan, lalu ngajar orang ngasika iya, deka dikumbai besai dalam Perintah Serega.” Sapa Roh ti ngaga “ajar ngelanggar Adat? Kati sida enda meda ngagai sapa ujung iya sida diserahka? Ujung iya pengawa sida diletak ba Yesus Kristus. Lalu barang sapa aja ti ngumbai Jesus mit, laban setegal Jesus ngemeratka Adat, deka dikumbai pemadu mit ulih Iya ti ngirumka Jesus.

Taja pan Jesus ukai datai deka ngukum dunya tu tang nyelamatkan iya, kati bisi orang ti ngajar pasal adat baka enggi Jesus? Jesus ngajar pasal Adat, tajapan batang tuju penatai Jesus iyanya “mai pengidup enggau penampak ti meruan nengah Injil.” Kati bisi ke orang ulih ngajar pasal Adat lebih nyemetak sereta nenak baka ajar Jesus ngena jaku sida empu? Lalu sapa ti deka ngubah jaku Jesus? Sapa ti ngerah Anak Allah Taala bekaul enggau bakani Iya patut agi ngajar? Sapa ti ngajar Iya chara ti lebih manah agi meritaka pesan ti diterima Iya ari Apai?

2. Jesus bejaku ke sapa aja ti “ngelenyauka siti ari pesan dalam Adat” Aram kitai berati lebu Tuhan kitai ngena leka jaku “Pesan” iya sama reti enggau “Adat, Taurat

sereta Bup Nabi”. Bala nabi nadai nambahka nama-nama ba Adat nya. Sida nabi bela nerang, madah sereta ngeringka Adat nya, nitihka iring Roh Kudus ba sida.

Dalam ajar ba bukit, dia Jesus mantangka ukum ke ungkup “sapa aja ti ngelanggar siti ari pesan Adat nya tajapan nya Adat ke paling mit,” kelebih agi orang ke sengaja ngelanggar iya. “Barang sapa nyaga semua serampur Adat tang enda mujur ngasika siti ari Adat nya deka betanggungjawab ke semua Adat nya.” Pengeringat Tuhan tetap bisi ba sida sama baka sida ti udah ngelanggar tiap pesan nya. Ari nya Tuhan enda ngemendarka pengingin ti jai tajapan siti aja. Tuhan sigi enda nyendiaka ruang ungkup engkeramba sekali pan. Tuhan enda nerima kebuah tauka nama utai ti dikumbai dosa. Allah Taala minta pengambis penaluk, ari nya kitai mesti nyaga semua pesan Iya. Enti kitai enda, dia semua penyerah enggau pemendar penaluk kitai ke sekeda pesan dalam Adat nya deka lelak baka nya aja. Beduduk ari nya, kitai deka lenyau sereta seranta dalam roh belama iya.

Tuhan Jesus nyakar orang ti enda taluk ke “pesan dalam Adat ti paling mit.” Dalam penerang tu, Jesus enda nerima kebuah ti dikena mayuh orang nipu diri empu, tajapan sida enda ulih nipu Allah Taala. Orang ke bedosa nyebut bakatu, “dosa tu mit, nie? Kati Tuhan enda kasih ke aku dalam pekara tu? Laban aku enda ngelanggar bagi pesan dalam Adat ke penting tauka besai, diagih aku Tuhan enda ngakim aku lebih ari ti patut atas penyalah tu.” Pengandalka bakatu nadai reti, semina ngelebu diri empu sereta belik!

Belalau ke tangkap runding kitai mensia, dia pesan dalam Adat Tuhan nya dibagi kitai ngagai dua bengkah, sebengkah nya pesan ti besai lalu sebengkah agi pesan ti mit. Iya ke amat, pesan tu enda ulih dipechah tauka dibagi baka nya. Enti kitai bejaku ke pekara tu enggau silik, sigi nadai jaku “dosa mit, dosa besai.” Tiap dosa nya ngelanggar pengudus Allah Taala, lalu tiap penyalah nya ngelanyaika mulia Serega.

3. Jesus ngingatka barang sapa ti ngelenyau sereta ngajar orang ngelenyauka pesan dalam Adat nya taja pesan nya pemadu mit ari pesan kebukai, orang nya diagihka ngajar orang bukai ngereja baka nya. Ngambika banding, tiap iku orang ke mabuk ba genturung pendiau orang mayuh, dia orang nya ngajar ulah bakani orang pemabuk. Baka nya mega enti orang enda bebasa ke hari Sabat, dia orang nya ngajar orang bukai ngamahka hari Tuhan nya.

Orang ti sengaja ngelanggar Adat enda semina ngelanggar naka nya aja, jarang sida ngereja naka nya aja tang sida terus ngajar orang bukai ngelanggar Adat nya mega. Kelebih agi enti orang nya kering batang rekung sereta lalu ngelanyai ke jaku lalau orang. Ujung iya, orang ke baka nya nyadi pengatur dosa. Lalu bala raban ke ngelanggar pesan Adat nya bergantung ba juluk sida pengatur dosa nya, sida enda ninggalka kereja nya bakanya aja tang ngena jalai nya sida nunduk tauka nyerahka diri ngagai dosa nya, anang ke deka ngelepaska dosa nya. Nengah chara nya, sida terang bendar ngajar orang pasal dosa ti dikereja sida.

Ku Jesus nganu orang ke baka nya, orang nya “deka dikumbai pemadu mit dalam Perintah Serega.” Disebut ngena jaku bukai, “sida nadai bagi dalam Perintah Serega, nadai bagi ari pesaka Allah Taala, nadai bagi dalam pemendar enggau pemaik enggau pengaga dalam Roh Kudus”. Ketegal nya, sida nadai bagi dalam mulia ti deka diberi ngagai Anak – anak Allah Taala.

4. Endang sigi amat, “barang sapa aja ti ngelenyauka siti ari pesan Adat Taurat, taja ke paling mit pan, lalu ngajar orang ngelenyau ke pesan nya baka ke dikereja iya empu, dia orang nya deka diau ba endur ke paling baruh ba dalam Perintah Serega.” Sida tu sigi nadai jalai bempu bagi dalam Perintah Kristus enggau Allah Taala. Sida

nya deka dibuai ngagai endur ti petang, dia meh alai sida deka “nyabak sereta begerit ngeli.” Bakani ku ujung iya ke sida ti ngelanggar pesan ti dibai bala raban ti dikirumka Allah Taala? (sida nya meh ke kena empas “nyabak sereta begerit ngeli”). Nama penyadi bala pengajar pelesu ti ngelanggar sereta ngajar orang ngelanggar pesan dalam Adat enggau sengaja? Nama pengujung ke sida ti nadai ngembuan ulah ti manah, nemuka ba dalam pengidup sida enggau ba ajar sida?

5. Bisi beberapa gaya gamal bala sida ke dikumbai pengajar pelesu. Keterubah, sekeda sida idup enggau sengaja ngaga dosa sereta gaya ulah sida ti bedosa. Enti orang ke sigi ngaga dosa nya ulih ngajar nengah teladan sida ti bedosa, dia lebih agi besai penau bala raban ke sigi pemela Tuhan ti bedosa, matak orang nitihka sida. sida ti ngaga dosa tu tau bendar matak orang nitihka sida, taja sida enda ibuh bebendar ngeringka ke ajar sida, taja sida enda ibuh kiruh ngiga kebuah sida ka bedosa tauka taja sida enda beguna ngaluska penyai dosa ngagai pemadas. Enti sida ngiga kebuah sida bedosa nyadi pemunuh, kepala pemunuh, sida nya meh nambahka pelayuh mensia nuju pemat. Sida nya meh nyadi perengka ke paling manah ari anak lelaki kuasa pemetang. Lebu sida tu begempung enggau sitan, sida sigi dikerah betemu. Sida enda mudah tenggelam ngapa enti sida enda narit tauka nating orang mayuh enggau sida.

6. Nangkan ke nya, sida ke dikumbai pengajar pelesu tu disemak ke enggau gaya ketuai ti enda kisuk enggau pengerusak pengidup. Sida tu enda peduli ke hal dosa enggau pengudus dalam ati, sida ngadang diri enda ditating dosa sereta enda ribat kiruhka hal pemendar, sida nadai agama tauka enda beguna ke agama. Pendiau pengidup sida tu mengkang niti nali chara ke lama nemuka ba genturung orang mayuh tauka ba pengidup sida kediri, sida enda pura – pura lebih ari pangan diri.

Pengajar pelesu ke baka tu, enda semina ngelanggar pesan ti pemadu mit aja tang sida ngelanggar semua pesan dalam Adat Allah Taala ti bekait enggau kuasa pengudus. Sida ngemaruhka pesan Allah Taala ti deka ke kitai meruan nangika Allah Taala sepanjangi sengkang pengidup kitai sereta pesan ti mai pengelepaska kitai. Sida enda taluk ke pesan Tuhan ke patut dikena sida nyikap diri ngisi minyak ke lampu ketenggau sida, pia mega sida enda taluk dalam bebendar napatka jalai tama nengah pintu ti sempit.

Serampur gaya pengidup sida, nyengkaum teon ti taing – taing lebu sida ngajar nya semina mimpi sida pengajar pelesu ti nadai pengarap nya ngadang diri nyadi orang Kristian tang sida enda. Pengajar ke baka nya ngumbuk semua orang ti nitihka ajar sida ti mai orang ngetu badu agi ngereja ke pengawa Tuhan lalu pajak ke tindak. Nya alai anang iran enti raban pemela Tuhan enggau semua raban ti nitihka iya deka sama bela diau ba api ti enda nemu padam.

7. Semua pemela Tuhan ti nadai pengarap tu, bediri pemadu tinggi dalam perintah munsuh Injil Kristian, sida amat nyata sereta tampak “jai jaku ngelaban Adat sereta ngakim Adat.” Sida ngajar orang bukai ngelanggar, ngubah sereta ngelenyau ke Adat. lalu sida ngajar orang ngelenyauka utai ti patut dititihka dalam Adat ari ke ditemu orang ti enda taluk ke Adat ti mit tauka besai. Dalam mayuh jaku, pengajar – pengajar pelesu tu bejaku enggau enda belapik: “Nama utai ti digaga Tuhan enggau Adat nya? Tuhan muai iya. Semina siti aja utai ti enda tau enda iyanya pengarap, laban nadai siti syarat dalam adat nya engkeman agi ke rebak tu.

“Jesus nya berani amat, ajar nya lain ari ke ngelama tu, Iya tu ngelaban Tuhan.” pia ku Pengajar pelesu. Sida mega madahka Tuhan Jesus ke dikirum ke Apai, enda nemu nusi berita ari Apai, laban setegal Jesus nyebut baka tu, “Tuhan, anang ninggang ke dosa tu ngelaban sida. Apai ampun sida laban sida enda nemu utai ti dikereja diri.”

8. Pekara ke amat nengenyitka iyanya pengajar pelesu tu pecaya kediri bebasa ke Kristus nengah jalai ngelenyauka Adat Tuhan nya. Sida ngumbai diri ngerembaika reti Adat nya, tang ba timpuh ke sama sida ngerusakka ajar Adat nya. Amat sida bebasa ke Tuhan Jesus tang chara sida baka ke dikereja Judas, ku Judas “Pengajar! lalu nyium Iya.” Ku Jesus bejaku enggau semua pengajar ti baka pengawa ke dikereja Judas: “kati nuan nyual Anak Mensia ngena sium?” Lebu kitai besaksi ke darah Kristus lalu ba timpuh ke sama kitai ngambi mahkota Iya, kitai mudi Iya enggau sium.

Kitai dikumbai mudi Tuhan Allah Taala lebu semina ngambi bagi dalam Injil ke dikerindu kitai aja. Tang nadai siku ari pengajar ke baka nya ulih lari ari upah atas semua utai ti udah dikereja sida. Bala Pengajar pelesu ngajar jalai pengarap nemuka sechara langsung tauka enda, sigi nyeliahka ajar pasal penaluk ke Tuhan. Kitai enda ulih ngelarika diri ari diakim enti kitai ngajar pasal Kristus, tang kitai muai tauka nglemika pesan ti pepadu mit ari pesan Allah Taala.

9. Endang diadang sigi enda ulih kitai ngembuan pengeransing ke kelalu tinggi ba “pengarap nundaka dipilih Allah Taala.” Tang semua kitai mesti ngaku “laban pengasih Tuhan meh nuan diselamatkan ulih pengarap; nya ukai asil ari kereja nuan tang pemerik Allah Taala, ukai ari ulih pengawa ke dikereja nuan, ari nya anang bisi orang ngemegah ke diri empu. Kitai mesti enggau terang merika Iya ngagai tiap orang ke endang bedosa, “pechaya tauka arap meh ke Tuhan Jesus lalu nuan deka diselamatkan.”

Ba timpuh ke sama, kitai enda tau enda rajin awakka orang bukai tau nemu pengarap ke ku kitai iyanya “pengarap ke bekereja nengah pengasih.” Kelebih agi ari nya, kitai enda diselamatkan ulih pengarap nya, enti kitai enda dilepaska ulih kuasa enggau pengasai ti salah belama. Lebu kitai madahka baka tu, “Arap meh lalu nuan deka diselamatkan.” Ba senentang tu ukai reti baka tu, “Pecaya meh nuan lalu pindah ari dosa ngagai serega, nadai nengah proses pengudus ke patut dulu.” Ba pekara tu kitai ukai nganti pengarap ngena pengudus.

Nambahka nya, lebu kitai madah: “Arap meh, lalu nuan deka nyadi kudus; pechaya meh dalam Tuhan Jesus nuan deka tetemuka pemaik enggau kuasa, nuan deka nerima ari Iya, ba dalam Iya nuan pechaya, ke kuasa ngendit dosa ti dibaruh kaki nuan.” Asil pengarap iyanya dalam kuasa kerinduka Tuhan Allah Taala kitai enggau pengambis ati sereta lalu mela Tuhan enggau pengambis penering. “Ngagai sida ti enggau penuh penyabar ngereja utai ti badas, ngiga mulia, basa sereta pengidup meruan, Tuhan deka meri pengidup ti meruan belama iya.” Nengah chara tu, nuan deka ngereja lalu ngajar semua pesan dalam Adat Allah Taala belabuh ari pesan Iya ti mit datai ke pesan ti pepadu besai. Nuan deka ngajar sida nengah pengidup enggau ari jaku ti pansut ari mulut nuan, lalu ari nya nuan deka dikumbai besai dalam Perintah Serega.

IV. Pemanah Adat

1. Sida ke ngajar jalai perintah Serega kelimpah ari ke nengah pengarap ti bekereja ari pengasih Tuhan, endang disadang ngajar jalai anchor, tajapan rambai jaku dikena sida nya “jalai Pengarap” tauka sida ngena rambai jaku ke lain ari nya. Kelimpah ari jalai ke nuju mulia, basa nyengkaum pengudus ati sereta pengidup, nya jalai – jalai ti mai nuju pengerusak. Jalai – jalai kebukai enda ulih mai ngagai pengidup ke penuh pemaik ti meruan belama. Ku Tuhan Jesus, “Laban, Aku madah ngagai kita, enti kita enda lebih agi lurus ari sida Pengajar Adat enggau orang Parisi, kita enda ulih tama Perintah Serega.”

Bala Pengajar Adat ti suah disebut dalam Sempekat Baru, endang meruan nyadi penyakal tauka pengelaban Tuhan kitai, sida chemuru, sida enda semina nunda tauka niru semua utai ti udah ditulis tang sida lebih agi tau matak ati kitai tau arap ke sida.

Enti iya rebak ke diatu, bala Pengajar Adat tu nyangka sida dikumbai kitai Loyar, tajapan sekeda penyalin jaku sigi ngumbai sida Loyar. Pengawa ti dikereja sida nadai sekali nunda ke deka Adat – adat Tuhan, taja sida belajar ke Adat Tuhan tang sida enda kiruh beratika undang – undang perintah menua (Civil Law).

Kebendar iya sida tu orang ke macha lalu nerangka Adat dalam Sempekat Lama enggau mega bup nabi, kelebih agi ba dalam langkau kain (Sinagoge). Pengajar Adat tu orang biasa aja, tang sida nyadi pengajar dalam raban bansa Judah. Enti kitai ngelala sida nengah reti ke asal iya endar, dia dikumbai bala Paderi tauka bala Teologi. Ba penemu raban bansa Judah, sida Pengajar Adat tu endang raban ti udah diletak dalam bup, ke madahka sida nya ngembuan nama ti tinggi ba pelajar.

2. Orang Parisi tu, orang ke nyerara diri ari orang bukai ketegal pengarap enggau pengidup sida. Sida tu datai ari sebengkah raban orang Judah empu tang sida bisi penyelai ari bansa Judah beduduk ari gaya pengidup sida ti ketat ngemeratka pengudus Adat Allah Taala. Sida tegap dalam penaluk ngasika Adat, indah ba Adat ti pepadu mit pan, sida mai pemerisepuluh peratus ari rempah baka telasih, adas manis enggau jintan ari asil kebun sida. Lalu sida tu endang selalu dipeda baka lebih tuchi ari pengidup semua orang.

Mayuh orang ari raban Pengajar Adat, sida tu nyengkaum orang Parisi empu. Indah Rasul Paul mega kala diajar nyadi Pengajar Adat, keterubah iya di Tarsus lalu nangkan ke nya di Jerusalem. Paul diajar ulih Gamaliel (siku orang ke pandai pasal Adat aki ini, tau mega iya tu dikumbai doctor ba Undang – undang). Bisi sekali Rasul Paul bejaku enggau nyawa ti inggar dalam balai kunsil, “Menyadi, aku tu orang Parisi, anak orang Parisi.” Nitihka penelaba, bala pengajar Adat ngansak orang Parisi ngereja nitihka teladan enggau ajar sida. Lalu laban ke sekaki, dia Pengajar Adat enggau orang Parisi endang sepenemu mutarka utai begulai, nya alai sida selalu besukung bekelikuh melit Juruselamat kitai Jesus Kristus. Ba genteran Bup Kudus ke dikena kitai tu, Tuhan Jesus madahka bida antara dua raban ti udu besaup ngelaban Iya, Pengajar Adat diadang bepenemu ari orang bukai lalu orang Parisi dikumbai tuchi agi ari orang bukai.

3. Enda mar endur kitai nentuka reti utai ti ku Tuhan kitai tu lebu Iya bejaku ke pasal “Pemanah Pengajar Adat enggau orang Parisi.” Tuhan kitai endang nemu enggau bendar gaya pengidup sida tu. Pengajar Adat terang bendar lurus ke diri empu, lalu kitai enda salah sangka ngapa pasal sida tu muai siti bagi ari semua pesan dalam Adat Tuhan.

Sigi amat ngiranka ati lebu orang Parisi enda besampi enggau pengelurus. Orang Parisi nya tak ati madahka penaluk enggau pemanah sida aja ngagai Tuhan: “Allah Taala aku meri terima kasih ngagai Nuan, laban aku enda baka orang bukai ke penchuri, ke jai, ke butang, tauka Pengumpul Chukai nyin. Aku bepasa dua hari dalam seminggu. Aku meri sepuluh peratus ari semua utai ti ulih aku.” Pemendar ba orang Parisi tu bisi dalam tiga bagi. Keterubah sumbung, “Aku enda baka orang bukai ke penchuri, ke jai, ke butang, tauka Pengumpul Chukai nyin.” Kedua, “Aku bepasa dua hari dalam seminggu.” Lalu ketiga, “Aku meri sepuluh peratus ari semua utai ti ulih aku.”

Ukai pekara ke mit lebu orang Parisi nyebut, “Aku enda baka orang bukai.” Senentang pekara tu; enda semua orang ulih nyebut utai munyi enggi sida tu. Baka sida nyebut diri, “Aku sigi enda ngemendarka diri anyut dibai bah besai ulih penyai. Aku sigi ukai orang ke idup angkunka dunya tu tang enggau penemu. Aku enda nitihka teladan mensia, tang Jaku Allah Taala. Aku ukai penchuri ti enda lurus tauka Aku ukai orang ke idup butang, tang semua hal ke disebut sida nya sigi bisi dalam tiap iku sida ti

dikangau nembiaik Allah Taala.” (Penchuri ba senentang pekara tu mega bereti orang ke enda lurus ba undang – undang, sida nya enda ulih diukum ngena Adat mensia, sida tu ngambi untung enggau nadai bekira ke guna orang bukai). Ku orang Parisi, “Aku enda baka Pengumpul Chukai nyin.” : Aku nadai penyalah, aku ukai orang ke bedosa. Tang aku rentang sereta rurus dalam pengidup.

4. Orang Parisi mega dikumbai sumbung ari segi jaku tu, “Aku bepasa dua hari dalam seminggu.” Jaku tu mesti diperati ke bebadas. Sigi amat orang Parisi ngemeratka bepasa dalam tiap minggu, sekali nya ba hari satu lalu kedua kena hari empat. Maya hari satu, sida bepasa ketegal ngenang utai ti nyadi menya kelua iyanya ba hari Moses nyambut dua Lampang Batu Adat ti ditulis jari Tuhan Allah Taala empu. Ba hari ke empat, dia orang Parisi bepasa laban ke ngenang Moses ti ngempas ke dua igi Lampang Batu Adat ba kaki bukit Sinai lebu iya meda patung anak chapi emas enggau bala iya benung betanda ngelinggi patung nya. Ba timpuh bepasa tu, orang Parisi enda makai dataika jam pukul 3 lemai, maya nya endur sida mai piring diberi ngagai Rumah Tuhan, lalu maya nya sida deka besampi kediri empu, belematika jaku Tuhan, macha Adat enggau bup Nabi sereta belematika diri. Nya alai bepasa dua kali seminggu nyadi bagi kedua dikena sida mandangka pemanah diri.

5. Nambahka nya, orang Parisi bisi nyebut baka tu, “Aku meri sepuluh peratus ari semua utai ti ulih aku.” Orang Parisi tu amat endar ngereja nya. Sida enda kala enda mujur meri sepuluh peratus nya, indah pemeru bukai baka telasih, adas, enggau jintan ari asil kebun sida. Sida tu amat enda bekira, sida pechaya semua utai enggi Tuhan Allah Taala. Sida meri sepuluh peratus ari semua utai ti ulih sida dalam setaun – taun nya.

Nitihka bup lama orang Judah, selalu nuliska pasal orang Parisi tu sigi enda mudah tepantup ati enti semina meri sepuluh peratus ari utai ti ulih sida ngagai bala Imam enggau orang Lewi. Sida nambahka pemeru sepuluh peratus ngagai Allah Taala nengah meri ngagai orang ti seranta, lalu sida ngena chara nya nengan ke jalai nya ngemuaska ati diri. Semua sida digerah meri bagi sebaka, nemuka lebu sida meri sedekah ngagai orang seranta tauka meri sepuluh peratus. Nengah meri ngena chara ke terit bakanya, dia sida ngadang diri enda nyimpan kediri empu utai ti enggi Allah Taala. Sida sigi meri dua kali sepuluh peratus ari taun siti ngagai taun siti, ari utai ti dikemisi sida.

6. Gaya pengidup ke enda angkun ke dunya, bepasa, meri sepuluh peratus enggau sedekah nyau nyadi menalan dikena madahka “pemanah ke orang Parisi enggau Pengajar Adat”. Kati pemanah nya lebih agi ari pemanah ti ditemu orang ke endang sigi ngelala utai ti dikumbai orang Parisi enggau Pengajar Adat tu manah? Tang nyangka orang deka nyebut, “semua nya pelesu sereta semina mimpi sida aja laban sida raban ti pura-pura aja.”

Aku nyaut tanya nya, sebagi ari antara sida nya orang ke penakut. Lalu sebagi agi antara sida nya nadai bepegai ba agama, sida nadai nangika Allah Taala, sereta nadai ati deka ngelantangka Allah Taala. Sida enda beamat – amat, sida nadai betatika mulia Tuhan ti deka datai. Sida semina rindu dipuji mensia. Nya meh utai ti ngasuh Tuhan kitai balat mejah sida ba timpuh nya. Kitai sigi amat enda patut ngadang semua orang Parisi nya pura – pura magang, laban setegal sekeda ari antara sida ke amat pura – pura. Endang amat, pura – pura tu nyadi pelasar gaya raban Parisi tang pura – pura tu ukai kelai ti dikena mandangka raban sida.

Nitihka Jaku ari Tuhan empu, pelasar gaya ulah orang Parisi iyanya sida pechaya ke diri empu lurus lalu ngumbai orang bukai enda tuchi. “Belurus diri empu, endang kelai orang Parisi. Orang Parisi ke baka tu ngumbai diri enda pura – pura ngapa, tang ku Jesus, orang Parisi mesti beamat – amat tauka enda tau ngembuan pengadang ke diri empu lurus. Kitai enda patut ngumbai diri nadai penyaruk agi, lalu ngaku diri ba mua Tuhan madahka nadai agi berunding ke diri empu lurus, tang ujung iya kitai nya meh ke pura – pura. Kitai ke baka tu enda sedar ke diri empu enda beamat – amat ba mua Tuhan, kitai bejaku enggau Tuhan nundaka chara ti dirunding kitai, kelebihan agi kitai semina ngira diri lebih agi ari orang bukai.

Nadai chunto bukai kelimpah ari Rasul Paul empu, lebuah Rasul tu udah nyadi penitih Kristus, iya ulih bejaku baka tu “Aku enggau naka ulih ngintu ati diri beresi di mua Allah Taala enggau dimua mensia.” Indah lebuah Rasul tu agi ngadang diri sigi orang Parisi, iya nyebut, “menyadi! Nyentuk ngagai sehari tu aku udah idup enggau ati ti beresi dimua Allah Taala.”(SPKR 23:1). Rasul Paul endang amat taluk ke Adat Allah Taala, nemuka lebuah maya sebedau iya dikangau Tuhan nyadi Rasul tauka pengudah iya dikangau nyadi Kristian. Paul ukai orang ke pura – pura ngapa, indah lebuah iya merinsaka Gereja dataika Iya diperinsa ketegat ngajar pengarap ke Tuhan Jesus. Nya alai patut bendar pemanah ke bakanya ditanam dalam ati Pengajar Adat enggau orang Parisi, ngambika sida beamat – amat ngembuan pengarap ti mandangka sida lurus dalam semua sembah ngagai Tuhan Allah Taala.

7. Tuhan Jesus madah baka tu, “Laban, Aku madah ngagai kita, enti kita enda lebih agi lurus ari sida Pengajar Adat enggau orang Parisi, kita enda ulih tama Perintah Serega.” Semua kitai ti dikanggau dalam Nama Kristus mesti meretika jaku tu enggau penemu ke dalam. Sebedau kitai nyubak ke ujung ke agi bakani empas jaku pemanah tauka pengelurus kitai ulih lebih agi ari enggi sida Pengajar Adat enggau orang Parisi. Aram meh kitai merasa sekaligus kitai bisi ngembuan standard tauka tikas gaya pengidup ti baka enggi sida nya.

Pekara keterubah, orang Parisi “enda baka orang bukai,” sida dipeda amat manah. Tang kati kitai baka gaya sida? Kati kitai berani ngintu pengidup ke nyelai sekali ari orang bukai? Kati kitai enda lebih rindu agi nyemerai nitihka entali ai? Kati kitai enda semampai ngena agama sereta akal runding, setegal kitai enggai enda dipeda enda baka selama? Kati kitai amat nadai penakut tauka malu anyut ditabanka jaman ari ke pansut ari jalai pengelepas? Kati kitai ngembuan pemerani nyeliahka alun gelumbang pasang? Kati kitai berani belanda ninggalka pengerindu dunya tu? Kati kitai amat ka taluk ke Allah Taala ari ke nitihka peneka kuasa mensia? Enti kitai enda ulih, dia kitai jauh tinggal dibelakang orang Parisi. Nya alai amat manah enti kitai lebih agi ransing ari pengeransing ke dikembuan orang Parisi nya.

Tang peratika enggau silik agi, kati kitai ulih belalauka chara gaya orang Parisi dalam kitai ngemuliaka Allah Taala? Lebih kurang baka tu ku orang Parisi madahka diri, “Aku enda ngereja utai ti tau nganu nyawa orang bukai. Aku idup nadai dosa ari ada. Aku nadai ngereja nama – nama utai ti tau mai ati aku empu ngakim pengawa aku empu.” Bah! Kati nuan ulih bejaku tauka ngereja baka enggi sida nya? Kati nuan pechaya kediri ulih? Kati nuan amat enda ngereja nama – nama utai atas ati nuan empu ti ulih ngukum nuan empu?

Enti nuan ukai orang ke butang tauka ukai orang ke udu jai jaku sereta jai ba pengawa, kati nuan siku orang ke lurus? Sukat keterubah atas utai ti dikumbai lurus, pia mega utai ti dikumbai pengasih iyanya, “dalam semua utai kereja meh ngagai orang bukai, baka ke dikereja nuan ke nuan empu.” Kati nuan nyingkang belalauka atur nya? Kati nuan nadai kala ngereja utai ke dikenggai nuan nyadi ba nuan ngagai orang bukai?

Kati nuan enda berupai enda lurus? Kati nuan ukai penchuri? Kati nuan ukai orang ke beambi ulih ari pengelemi orang tauka ba utai ti diguna orang baka dalam nuan meli tauka bejual? Enti semak nuan orang ke bedagang, kati nuan minta tauka nerima enda lebih ari rega ti patut ba barang ke dijual nuan? Kati nuan minta tauka nerima enda lebih ari ke patut ari orang ke enda mereti pasal dagang nuan? Kati nuan enda ngambi mayuh untung ari orang biasa ti dibanding enggau sida ti udah teleba dalam pengawa dagang? Enti semak naun ngereja ngelakar baka nya, nama kebuah ati nuan empu enda ngukum nuan? Nuan nyata bendar ngenchuri! Kati nuan ngeletak lebih ari rega baka selama tauka nuan minta rega lebih ari ke patut atas barang ke benung beguna bendar ba orang tang maya timpuh nya semina company nuan aja ke bisi nyediaka barang nya? Enti nuan ngereja baka nya, nuan mega penchuri ti nyata bendar, enti baka nya amat meh nuan enda lebih ari sukat pengidup orang Parisi.

8. Pekara kedua, orang Parisi ngereja nundaka semua pekara ti diletak dalam atur tauka adat tauka sida sigi mandangka utai ti dikemeratka agama sida, ngambika banding sida bepasa 2 kali seminggu. Orang Parisi meruan datai ngulo semua pengawa sembiang. Sida tegap dalam besampi, macha sereta mendingka Jaku Bup Kudus. Bah! Kati penaluk kitai empu ke Tuhan, kati bisi nyingkang baka enggi sida? kati nuan mayuh bepasa tauka suah bepasa? Kati nuan bisi bepasa 2 kali seminggu? Aku takut, enti nuan enda ngereja baka nya. Kati nuan tak semina bepasa sekali seminggu kena hari lima aja dalam taun tu? Ba Gereja kitai terang bendar meri pesan ngagai semua raban Gereja mesti bepasa ngena hari lima enggau maya ngintu 40 hari dalam musin Lent. Kati nuan bisi bepasa tajapan semina ka dua kali aja setaun? Aku irau ati ke sekeda kita enda ulih ngintu utai tu.

Kati nuan bisi ibuhka peluang enggau orang mela Tuhan tauka enggau orang ngambi bagi dalam mela Tuhan tauka nuan nyata bendar nulak nyambut Pemakai penganang Tuhan? Sida nadai makai roti sereta ngirup ari pemakai Tuhan dalam timpuh nyau bebulan – bulan tauka nyangka nyau udah betaun tatak nadai nyambut pemakai nya! Kati nuan tiap hari macha tauka ninga sekaligus belematika Jaku Bup Kudus? Kati nuan bisi enggau raban Gereja nuan begulai besampi tiap hari lebu nuan bisi peluang? Enti nadai, kati nuan datai sembiang lebu barang maya nuan ulih? Kelebih agi lebu nuan ingatka diri patut nyaga pengudus diri? Kati nuan enggau naka ulih ngaga peluang endur alai nuan ulih datai besembiang ba Gereja? Kati nuan amat lantang ati lebu orang bejaku mai nuan baka tu; “aram kitai besembiang ba Rumah Tuhan?

Kati nuan ransing ati lebu besampi kediri? Sekalika nuan makin rajin ngintu disiplin besampi tu? Kati nuan ngelakka hari ngelebus enggau nadai besampi? Kati enda sebagi ari bala nuan ke ngambis ka beberapa jam dalam besampi tiap hari (Bala orang Parisi? Dini alai nuan bisi udah bekiraka timpuh sejam besampi udah chukup tauka kelalu lama? Kati nuan bisi masa sejam sehari, tauka seminggu besampi ngagai Apai ti enda dipeda? Kati nuan besampi semina sejam dalam sebulan? Kati nuan udah nembuka timpuh sejam besampi kediri sekumbang nuan udah ada ke dunya tu? Ahh... kasih amai nyadi kristian! Kati orang Parisi enda angkat idup baru lalu ngakim nuan sereta ngukum nuan? Pemanah orang Parisi jauh lebih ari pemanah nuan, baka serega enggau bumi.

9. Ketiga, orang Parisi mayar sepuluh peratus lalu meri mega sedekah ari semua pemisi sida. Dalam kitai meratika orang meri mayuh! Kekadang kitai berunding tauka bejaku, “iya orang ngereja utai ke badas.” Dalam hal tu, kati kitai datai ba peninggi tikas gaya pengidup baka tu? Sapa diantara kitai ti betuah – belimpah dalam pengawa ti manah baka enggi orang Parisi? Sapa diantara kitai ke amat meri ngagai Tuhan

enggau ngagai orang ke seranta ke nundaka peneka Tuhan empu? Sapa dientara kitai ti meri 10 ringgit ari 50 ringgit ti dikemisi kitai empu tauka meri nundaka pema-yuh enggau pengurang pemisi kitai? Ni maya kitai ngena ajar Tuhan tauka peneka Tuhan dalam kitai talukka semua atur Allah Taala enggau mega nyeliahka penyai sereta ngaga utai badas kelebihan ari pemanah bala pengajar Adat enggau orang Parisi?

10. Enti semak pemadas kitai semina sama enggau enggi orang Parisi, nama utai ti ulih kitai? Ku Jesus, “Laban, Aku madah ngagai kita, enti kita enda lebih agi ari bala pengajar Adat enggau orang Parisi, kita enda ulih tama Perintah Serega.” Bakani pemadas tauka pemanah enggi kitai Kristian ulih lebih agi ari pemadas tauka pemanah enggi sida nya? Dalam nama chara pemadas tauka pemanah orang Kristian ulih lebih agi ari ti dikembuan orang Parisi enggau pengajar Adat?

Keterubah iya, ngambi pemanah tauka pemadas enggi kitai Kristian tau lebih manah agi ari enggi orang Parisi, taja pan sida amat silik dalam mayuh hal laban ke ngemeranka tradisi aki ini sida kelial. Ngambika chunto, sida amat meruan nyaga pesan ti ke empat, sida tetap ngibun pesan ke tiga ti bekaul enggau ngena Nama Tuhan Allah Taala. Sida enda tentu ka kiruh ke hal ti mit tauka ba pekara sumpah pelesu. Ari nya pemanah tauka pemadas sida semina sebagi aja.

Pekara baka nya belaban bendar, laban pemadas tauka pemanah chara Kristian ti bendar nadai bebagi. Kristian ti bendar enda semina ngemeratka siti tauka enda semina ngemeratka sekeda bagi Adat Allah Taala aja, lalu orang Kristian sigi enda ngeleka ke pesan Adat kebukai. Tang kebendar, orang Kristian nyaga, ngintu, ngibun semua pesan dalam Adat Allah Taala, rinduka semua Adat sereta merega adat nya lebih ari merega emas enggau batu berega.

11. Endang disadang mega, sebagi ari Pengajar Adat enggau orang Parisi bebendar ngintu semua pesan ke ditulis Allah Taala. Bakani pemender sida dibaruh Adat sigi amat nadai penyalah. Tang tajapan pia, pemanah tauka pemadas orang Kristian sigi tetap lebih agi ari sida. Tu dipeda nengah chara orang Kristian ngamatka Adat nya ukai semina ba atas keretas aja tang nyengkaum roh Adat nya. Ba orang Kristian, reti ngembuan pemanah tauka pemadas iyanya penaluk ari lubuk ati sereta tubuh ngagai Adat Allah Taala. Dalam pengeransing entara orang Parisi enggau orang Kristian nyaga Adat Allah Taala sigi enda sebaka. Nengah semua batang ajar Jesus ba bukit, dia Iya ngeringka ba bagi tu.

Pemanah tauka pemadas orang Parisi semina dipeda ari luar tubuh tauka ari gaya ajar sida. Tang pemanah enggau pemadas orang Kristian nyengkaum bagi dalam tubuh. Orang Parisi semina meresi bagi ti dipeda mata aja baka mangkuk enggau piring. Orang Kristian ti bendar sigi tuchi ari dalam ati sida. Orang Parisi bekereja ke Allah Taala nengah pengidup ti lurus, tang orang Kristian mela enggau ati ti tuchi. Orang Parisi mansutka daun enggau buah – buah dosa, tang orang Kristian mungga ke kapak ba akar dosanya.” Orang Kristian enda lantang enggau pengudus ti semina ke ceremin aja, laban pemanah tauka pemadas nya ukai ke dipeda aja tang iya pengidup kitai, roh kitai sereta kuasa Allah Taala penyelamat kitai ti mesti diasai dalam ati kitai.

Ngambika kitai enda tepejuh ngereja utai ti tau pulaika dosa, dia kitai mesti ngereja utai ti badas iyanya ngasika pesan Allah Taala ti ari dalam ati kitai (internal). Tang semua utai ti badas enggi orang Parisi semina luar ke dipeda (eksternal). Nya alai besibir bendar gaya pemadas tauka pemanah orang Parisi enggau orang ke seranta dalam Roh, orang ke ngulit, orang ke baruh ati, orang ke lapar sereta auska pengelurus, orang ke kasih ke orang sereta tuchi ati (semua tu gaya ulah orang Kristian ke dikumbai sifat internal). Indah orang ke bekereja ke pemaik, orang ke kena perinsa ketegal

pengelurus nya kualiti berekat ti diberika orang Kristian lebu sida angkat lalu ngereja ari pemanah ke datai ari penuchi dalam lubuk ati sida. Laban ketegal pemanah Pengajar Adat enggau orang Parisi ti semina ba gaya ke dipeda ari luar (eksternal); lalu pemanah tauka pemadas enggi orang Kristian nya ari dalam (internal), ari nya Allah Taala merega tiap pengawa enggau pemerinsa sida ti bepelasarka juluk ati sida.

12. Sapa orang ti mai nama ti kudus atas Kristian. Keterubah, tentuka pemanah enggau pemadas nuan enda baka gaya enggau enggi Pengajar Adat enggau enggi orang Parisi. Anang meh nyadi nunda baka orang bukai. Mesti berani berdiri kediri empu. Tegam! Chunto – chunto enggi orang bukai ngena pemanah tauka pemadas. Enti nuan nunda tauka nitihka nama – nama chara laban ke belalauka “pemayuh orang ke nitihka chara nya,” dia nuan endang sigi enda ulih nyeliahka kereja ti salah. Anang ngelakka utai ke selalu dikereja nuan tauka dikumbai kitai peneleba laban suba bakanya, pia mega laban dunya modern nyadika lalau ke ngiring nuan. Tang ke manah agi titihka akal ti betul ke bepugu ke pengarap ti bendar. Penyadi utai ti dikereja orang enda patut nyadika penyanding ke lumur satu tauka berega bendar ba nuan. “Tiap iku orang bela bisi tanggungjawab ke Tuhan Allah Taala.” Enti nuan ulih nyelamatkan semangat orang bukai, kereja meh; tang ti enda pan nuan mesti beratika pengelepas semangat nuan empu, anang nyingkang ba jalai pemat, “laban pintu ti besai enggau jalai ti luas nuju ngagai pengerusak, lalu mayuh orang nengah jalai nya.”

Bakani nuan ulih nemu jalai nya salah iyanya maya nuan meda mayuh orang nengah jalai nya. Kati jalai ke ditengah nuan diatu luas tauka mayuh orang nengah iya sereta lawa? Enti iya pia, nuan sigi enda mudah enda mujur datai ba pengerusak. Anang meh nyadi pengerusak bala kaban ke ngelinggi nuan diatu! “Badu agi ngereja penyai...” Isaiah 1:16. Lari meh ari dosa baka ke diayan ular! Anang ngereja utai ti tau nganu nyawa tauka semangat nuan. “Tiap iku orang ti ngereja dosa nya anak sitan.” Nya alai anang bisi dipenggi nuan gelar anak sitan nya. Bakani enggau dosa ke dipeda (eksternal)? pechaya meh ke pemeru Tuhan Allah Taala ti amat chukup dikena kitai nyeliahka dosa. Dalam hal baka tu, bebendar meh ngambika kitai ngembuan ati ti terang ngagai Allah Taala pia mega ke semua orang.

Kedua, bekaul enggau atur – atur Allah Taala, anang ngelakka kitai labuh ngagai pemanah baka enggi orang Parisi enggau Pengajar Adat. Enti pengawa nuan baka ba senentang penering tubuh nuan enda nguji bepasa tiap minggu, dia nuan anang bula ke diri empu. Bepasa mesti engkeman enggau pengulih sereta enggau naka ke ulih nuan dalam seminggu. Anang nyeliahka peluang diri besampi begulai enggau orang sereta sampi nuan kediri, anang muai peluang ti bisi endur nuan tau nyambut pemakai penganang Tuhan laban nya tubuh enggau darah Jesus Kristus.

Rajin ke meh belajarka Bup Kudus; bacha enggau naka ulih, lalu belematika Iya siang enggau malam. Lantang meh tiap kali bepeluang ninga ke “Jaku Pemaik” ke dibai bala pemela – pemela Tuhan. Beridup ba ‘pemendar Pengajar Adat enggau orang Parisi’ nengah ngena semua perengka pengasih Tuhan lalu mega meruan ngambi bagi dalam pesan Tuhan sereta beratika tiap – tiap pesan Allah Taala. Awakka kitai tetap ngereja semua tu, abis kurang pan datai ke nuan lebih ari standard tauka tikas pengidup Pengajar Adat enggau orang Parisi.

Ketiga, Anang meh kitai tepejuh baka gaya orang Parisi dalam ngereja utai ti badas. Beri sedekah tauka pemeru ari semua utai ti dikemisi nuan. Kati bisi orang bukai lapar? Enti pia beri sida pemakai. Kati bisi orang bukai aus? beri sida air irup. Kati sida nadai gari? beri meh ka sida gari. Enti nuan ngembuan reta pengeraja dunya tu, anang nagang diri meru sepuluh peratus ari semua reta nya. Awakka nuan nyadi orang ke gerah jari ke pemadu bendar lalu penyerah nuan mega. Nama kebuah enda nyediaka ungu

orang bukai dalam chara ke sama bela nundaka dikereja orang Parisi? Nya alai diatu, kada ke nuan bisi timpuh sereta peluang, “bekaling meh enggau gerah jari, badas ati. Taja reta nuan ambis, lalu tubuh nuan ditanah pendam, tang deka orang nyambut nuan dirumah ti meruan belama.”

13. Anang semina puas ati enggau kereja ke baka nya. Awakka pemadas nuan lebih ari Pengajar Adat enggau orang Parisi. Anang jampat puas ati dalam taluk ke semua Adat, enti kitai enda mujur taluk ba sekeda bagi Adat nya. Talukka semua pesan Allah Taala tang mesti lalu “begedi ke jalai ti pelesu.” Kereja nitihka semua hal ti udah dipesanka Tuhan Allah Taala, lalu kereja semua enggau pengambis pengering nuan. Nuan ulih ngintu semua nya enti enggau pengambis pengering nuan. Nama kebuah? Laban “nuan sigi ulih talukka semua nya nengah Kristus ti pengering nuan.” Enti kelimpah ari Jesus Kristus, nuan sigi enda ulih ngereja nama – nama.

Ari atas semua utai, awakka pemanah nuan lebih agi ari Pengajar Adat enggau orang Parisi dalam pengidup roh sida. Nitihka penemu nuan, nama utai ti ke pepadu betul dalam agama tauka pengarap? Kati nya gaya ti di pandangka iya ke pepadu manah? Nyingkang lebih tinggi sereta dalam ari semua nya! Awakka agama nuan nyadi agama ati nuan. Awakka nuan nyadi seranta dalam roh. Lalu dalam kitai meda diri empu, awakka kitai nyadi mit, tegap runding, baruh ati sereta enda ngeninggi ke diri. Awakka nuan baruh ati, ngelala diri semina ari debu lalu enggau rinduka Allah Taala dalam Jesus Kristus Tuhan nuan enggau pengambis ati. Awakka serampul runding nuan, jaku nuan ke semua pemadas ke deka dikereja nuan lelih ari peneguh pengadang ti pepadu dalam ba endur nuan bediri ti bepun ari pengidup ti meruan belama iya.

Nuan enggau tiap iku orang kebukai benung sedia terejun ke dalam pengidup ti meruan, baik dalam mulia ti meruan sekaligus dalam api neraka ti meruan belama. Nya alai awakka nuan nyadi nelap, awakka enti nuan penuh enggau pemadas, penelap, pengeransing enggau penyabar ngagai tiap iku orang, dia ba masa ke sama, awakka semua utai ti dalam nuan auska Allah Taala ti idup, rindu dikena Tuhan dalam gamal Iya lalu tepantup ati enggau Tuhan. Bepangan enggau Allah Taala, pia mega enggau diri sama diri. Dalam roh tu, awakka ngereja sereta penuh penyilik dalam semua hal. Nengah chara nya, nuan deka “lebih agi lurus ari Pengajar Adat enggau orang Parisi,” lalu nuan deka dikumbai “besai dalam Perintah Serega.”

Terjemahan ini dilakukan oleh Pensyarah Iban di Sekolah Teologi Methodist, Sibul, Malaysia, Reverend Lembai anak Banyan (lembai@mtssibu.edu.my), berdasarkan pada terjemahan Pdt. Yohanes Samosir dalam Gereja Methodist Indonesia Wilayah II, *John Wesley on Christian Beliefs: The Standard Sermons in Bahasa Indonesia (Jilid II: 21-33)* (2005), 88-109. Kerja asal adalah Kenneth Cain Kinghorn, *John Wesley on Christian Beliefs: The Standard Sermons in Modern English, Vol. 2, Sermons 21-33* (Nashville: Abingdon Press, 2002), 124-47.